

岁功典

歲功典第八十六卷

仲冬部藝文一

黃鍾十一月啟

梁昭明太子

日往月來灰移火變暫乖語默頓隔秦吳既傳蘇李之書更共范張之志冷風盛而結鼻寒氣切而凝昏虹入漢而藏形鶴臨橋而送語彤雲垂四面之葉玉雪開六出之花敬想足下世號冰壺時稱武庫命長袂而留客施大被以招賢酌醇酒而據切骨之寒溫獸炭而祛透心之冷某攜戈日久荷戟年深揮白刃而萬定死生引紅旗而千決成敗退龍劍而却步月下開營進鯨鼓而橫行雲前起陣徒勞斬斫豈用功勳諸不具陳謹申微意

仲冬時令賦

以題爲韻

唐叔孫元觀

乾知大始變化惟衆白日貞輝以著乎運行素月虧盈以紀乎孟仲陰既往而陽受暑既驟而寒送景長而土圭可測氣肅而玉律潛中若乃搖落既謝戚戚無悰霜雪凝凌以戒節天地閉塞而成冬羲和在茲敬授人時周之正則建子爲首冬之夜則問如何其北斗闌干乘招搖而直子元堂在座

列羣后以聽辭冬之日可愛聞乎魯史一之日威發著於豳詩其神元冥厥德在水其器閔奄事官有司植元珪以絺纁乘元輅以載旗順物以終乃安其性因宜制節用必克正使夫有爲而天下御正無事而天下分定先王以之狩田孝子以之溫清萬人以之休息羣辟以之殷聘一以明國家之盛再以昭誦事之令夫唯敗度起功逆時興務重其徭役急彼征賦動衆不隨其物宜馭人不以其寬裕災異必降甲己之氣乘癘疾必行哭泣之哀聚則知邦國興否噫時令之可懼

仲冬時令賦

以題爲韻

蕭昕

歲杪星窮時臨月仲元冥氣肅黃鍾律中北陸陰凝西成物衆觀四郊而息老朝萬國而來貢於是
我皇乃親帥百辟觀隙三農整六軍以耀武肆大閱於仲冬然後乃卽太廟建元旗事神率禮撫俗
觀詩斥聲色以不御守和平而自持山澤從宜候飛霜而校獵川源有秩因涸凍而沈祠謹門閭而
守法慎蓋藏以應期斬木陽崖采周官於是月藏冰陰室詠豳詩於此時然後受計郡國大頒錫命
祭必先賢室惟行慶駕鐵驪以軌物居元堂而布政因宜制變必酌於古文授時鄉方乃行乎夏令
爾其謀猷克臧備物必具飭王政之禮戒土功之務天地旣貞陰陽乃裕苟愆伏之必節豈雪霜之

是遇故當北辰正而衆星拱東海深而百川赴既一人而作哲惟四方之所注撫空懷以自憐愧揚雄之作賦

仲冬時令賦

以題爲韻

張欽敬

粵若大君光宅海內文思開帝王之洪緒振皇紀之綱維敷化布和設明堂以聽政發祥儲祉坐宣室而受釐有典有則念茲在茲負宸蒸已凝旒肅祇享會必依乎是月寒暑不易乎斯時若乃睦以神人施乎政令普惠澤以流渥鼓薰風而入詠日月唯朗星辰克正調曆數之璿衡叶乾坤之寶命況乎陽氣告始幽歌御冬惟時是恤維政之雍穆元堂以敷化感黃冠以勞農命魯史之登臺或書雲物審周官之有祀時命秩宗於是恆憲聿修舊章遐布飭蓋藏之是密警門閭而必固一以永寧各知攸措滌器物之疏奄釐冰池之凝沍休力役省征賦養國中之鰥寡罷官守之尸素是使風雨丕順曾不爽於豐年霜露以時諒匪僭於歲暮撫三五之遐軌案道德之平裕方見與義農而比崇豈直等成周之景祚而已顧慙眇質叨承選衆神仙作尉非漢氏之稱梅孝友承家媿詩人之歌仲謬昌言於聖德豈緣情而有中

仲冬部藝文二

詩詞

大同十一月庚戌

梁簡文帝

茲園植藝積山谷久紆威直興轉多緒眞事亦因依是節嚴冬景寒雲掩落暉遠聞風瑟瑟亂視雪霏霏浪起川難渡林深人至稀山禽背逕走野馬歷塘飛

早發交崖山還太室作

唐崔曙

東林氣微白寒鳥急高翔吾亦自茲去北山歸草堂仲冬正三三日月遙相望蕭蕭過嶺上隴隴辨少陽川冰生積雪野火出枯桑獨往路難盡窮陰人易傷傷此無衣客如何蒙雪霜

草堂卽事

杜甫

荒村建子月獨樹老夫家雪裏江船渡風前徑竹斜寒魚依密藻宿鷺起圓沙蜀酒禁愁得無錢何處賒

仲冬

呂渭

江南仲冬天紫蔗節如鞭海將鹽作雪山用火耕田

十一月

劉蕃

憶長安子月時千官賀至丹墀御苑雪開瓊樹龍堂冰作瑤池獸炭氈爐正好貂裘狐白相宜

仲月賞花

韋同則

梅花似雪柳含煙南地風光臘月前把酒且須拚却醉風流何必待歌筵

十一月中旬至扶風界見梅花

李商隱

匝路亭亭艷非時裊裊香素娥惟與月青女不饒霜贈遠虛盈手傷離適斷腸爲誰成早秀不待作

年芳

丙子仲冬紫閣寺聯句

宋蘇舜欽

白石太古水

才翁

蒼崖六月冰昏明咫尺變

子美

身世逗留增橋與飛霞亂

才翁

人間獨鳥升風泉冷相搏

子美

樓閣暮逾澄反覆青冥上

才翁

躋攀赤日稜唄音充別壑

子美

塔影弔寒藤仙掌挂太一

才翁

佛壇依古

層巖喧聞鬪虎

子美

臺靜下饑鷹晴檻通年雨

才翁

濃羅四面罨日光平午見

子美

霧氣半天蒸潭碧寒疑

才翁

裂鐘清遠自凝陽陂冬聚筍

子美

陰壁夏垂繒有客饒佳思

才翁

高吟出遠凭雄心翻表裏

子美

遠目著

古今圖書集成

曆象彙編歲功典第八十六卷仲冬部藝文二之二

軒騰岑寂來清夜

才翁

沈冥接定僧宿猿深更杳

子美

落水靜相仍松竹高無奈

才翁

烟嵐翠不勝甘酸收

脫實

子美

剝隕布清塍北野才沈著南天更勃興恣睢超一氣

才翁

黠黠起孤鵬並澗寒堪摘看雲重欲

崩行中向背失

子美

呼處下高應庭樹巢金爵樵兒弄玉繩斷香浮缺月

才翁

古像守昏燈乳管明相照

沙弭綠自矜深疑嘯神物

子美

飢欲敵殺陵俯仰孤心撓回翔百感登畫圖風動壁詩句涕霑膺

先公有留

題在澄心閣

歲月看流矢

才翁

心腸劇斷絙追攀初有象悲憤遂相乘故賞知無遁遺靈若此憑依然忍回

首

子美

愁絕下峻嶒

才翁

十一月二十六日松風亭下梅花盛開

蘇軾

羅浮山下梅花村玉雪爲骨冰爲魂紛紛初疑月挂樹耿耿獨與參橫昏先生索居江海上悄如病
鶴棲荒園天香國艷肯相顧知我酒熟詩清溫蓬萊宮中花鳥使綠衣倒挂扶桑暎抱叢窺我方醉
臥故遣啄木先敲門麻姑過君急灑掃烏能歌舞花能言酒醒人散山寂寂惟有落藥黏空樽

直玉堂十一月一日鑲院是日苦寒詔賜官燭法酒書呈同院

前人

微霰疎疎點玉堂詞頭夜下攬衣忙分光御燭星辰爛拜賜宮壺雨露香醉眼有花書字大老人無

睡漏聲長何時却逐桑榆暖社酒寒燈樂未央

仲冬南樓野望

陳允平

繡幕香溫生暮寒淡煙漠漠水漫漫吟殘庾嶺梅千樹夢遶湘江竹萬竿風捲亂鴉棲古塔雪迷孤鴈落前灘一聲玉笛人何所更上南樓獨倚闌

翰林三朝御容戊戌仲冬朔把香前宮

元張翥

嘉禧殿前初日高瑞光先映赭黃袍雲間瑞露收金掌仗外微風颺彩旄黃鶴仙人周子晉碧鷄使者漢王褒禁園尙覺餘寒在未放春紅上小桃

丁酉仲冬卽景二首

葉顥

煙梢深處隱樓翎標格孤高迥出羣只恐聽琴驚夢醒踏翻松頂一巢雲樹頭清嘯兩三聲紙帳梅花睡欲成喚醒冷泉亭上夢嶺雲飛動月初明

二年十一月和煖如春上遊觀上苑召侍臣危素宋濂詹同吳琳及觀等賜宴於奉天門東紫閣蒙御製一序賜之曰卿等各賦一詩以述今日之樂

明魏觀

深冬晴暖動逾旬內苑遊觀詔侍臣五色慶雲開鳳尾九重麗日繞龍鱗和鸞喜奉彤車御式燕慚叨紫閣賓淑氣已從天上轉人間無地不陽春

十一月十五日吳園見梅花有感

汪道貫

獨樹梅花倍可憐爲傷遲暮得愁先物華莫負登臨興時序頻催犬馬年眼底雲光偷碧海歌中雪色照瑤篇因君轉憶揚州事官閣於今月正圓

浣溪沙

仲冬見花
塢櫻桃花

宋毛滂

小浦韶光不待邀早通消息與含桃晚來芳意半寒梢含笑不言春淡淡試妝未徧雨蕭蕭東家小女可憐嬌

仲冬部紀事

宋書禮志高陽氏以十一月爲正麤玉以赤繒

國語武王伐殷星在天龍

注

星辰星也天龍次名從須女八度至危十五度爲天龍謂周正月辛卯

朔二日壬辰辰星始見三日癸巳武王發行二十八日戊午渡孟津距戊子三十一日二十九日己

未晦冬至辰星在須女伏天龍之首

詩經豳風七月章一之日于貉取彼狐狸爲公子裘

周禮地官鄉大夫之職正月之吉受教法於司徒退而頒之於其鄉吏使各以教其所治

州長正月之吉各屬其州之民而讀法以攷其德行道藝而勸之以糾其過惡而戒之

山虞仲冬斬陽木

訂義

鄭康成曰陽木在山南者王昭禹曰斬陽木必以仲冬以水之盛氣養其堅則

齊諸其陰也

夏官大司馬中冬教大閱

訂義

鄭鍔曰春秋凡書大蒐大事大閱皆謂事之尤大也左氏爲之說曰大

簡閱車徒也以大司馬觀之春教以鑄鼓夏教以號名秋教以旗物至冬農隙則合三時所教者大習之故名曰大閱奚止簡車徒而已

秋官布憲掌憲邦之刑禁正月之吉執旌節以宣布於四方而憲邦之刑禁

訂義

鄭鍔曰大司寇正月

之吉布刑於邦國都鄙又縣刑象以示萬民小司寇於正歲帥屬觀刑象及宣布於四方憲刑禁矣布憲復掌之者蓋大司寇布之者舉其綱也小司寇宣之者行於朝也四方萬里或未之知布憲執

旌節適四方而宣布之所至之處又從而表縣之無有不明刑禁之爲不可犯也

漢書高帝本紀元年十一月詔諸縣豪桀曰父老苦秦苛法久矣誹謗者族耦語者棄市吾與諸侯約先入關者王之吾當王關中與父老約法三章耳殺人者死傷人及盜抵罪餘悉除去秦法吏民皆按堵如故凡吾所以來爲父兄除害非有所侵暴毋恐

十二年十一月行自淮南還過魯以太牢祠孔子

漢舊儀惠帝三年相國奏諸御史監察三輔郡所察者九條監者二歲一更常以十一月奏事

漢書武帝本紀元光元年冬十一月初令郡國舉孝廉各一人

元鼎四年十一月甲子立后土祠於汾陰脽上禮畢行幸滎陽還至洛陽詔曰觀於周室邈而無祀詢問耆老迺得孽子嘉其封嘉爲周子南君注子南其封邑之號以爲周後故總言周子

南君

宣帝本紀地節三年十一月詔曰朕旣不逮導民不明反側晨興念慮萬方不忘元元惟恐羞先帝聖德故並舉賢良方正以親萬姓歷載臻茲然而俗化闕焉傳曰孝弟也者其爲仁之本與其令郡

國舉孝弟有行義聞於鄉里者各一人

後漢書明帝本紀永平二年十一月甲申遣使者以中牢祀蕭何霍光帝謁陵園過式其墓

永平十七年冬十一月初置西域都護戊己校尉

章帝本紀建初四年十一月壬戌詔下太常將大夫博士議郎郎官及諸生諸儒會白虎觀講議五經同異使五官中郎將魏應承制問侍中淳于恭奏帝親稱制臨決如孝宣甘露石渠故事作白虎議奏

注今白虎通

和帝本紀永元三年十一月癸卯詔曰高祖功臣蕭曹爲首有傳世不絕之義曹相國後容城侯無嗣朕望長陵東門見二臣之壘循其遠節每有感焉忠義獲寵古今所同可遣使者以中牢祀大鴻臚求近親宜爲嗣者須景風紹封以章厥功

永元十三年冬十一月安息國遣使獻師子及條枝大爵丙辰詔曰幽并涼州戶口率少邊役衆劇東脩良吏進仕路狹其令緣邊郡口十萬以上歲舉孝廉一人不滿十萬二歲舉一人五萬以下三歲舉一人

安帝本紀建光元年十一月癸卯詔三公特進侯卿校尉舉武猛堪將帥者各五人

延光二年十一月甲辰校獵上林苑

順帝本紀陽嘉元年十一月辛卯初令郡國舉孝廉限年四十以上諸生通章句文吏能牋奏乃得應選其有茂才異行若顏淵子奇不拘年齒

玉海黃初元年十一月柴於繁陽有黃鳥銜丹書集於尚書臺於是改元

晉書禮志武帝泰始三年十一月改宗聖侯孔震爲奉聖亭侯詔太學及魯國四時備三牲以祀孔子

武帝本紀泰始六年冬十一月幸辟雍行鄉飲酒之禮賜太常博士學生帛牛酒各有差

咸寧四年十一月太醫司馬程據獻雉頭裘帝以奇技異服典禮所禁焚之於殿前

傅咸歎冬賦序予曾逐禽登於北山於時仲冬之月冰凌盈谷積雪被崖顧見歎冬煒然始敷

孝子傳焦華西秦時人父病甚仲冬思瓜求之不得忽夢一人黃冠謂曰聞子父病思瓜故送瓜以助子華拜受之及寤瓜在手馨香非常父食而愈

宋書符瑞志孝武帝大明三年十一月己巳肅慎氏獻楛矢石柝高麗國譯而至

李華復練塘序練湖幅員四十里永泰元年十一月二十三日拜韋損爲潤州增理故塘緣而合之廣湖爲八十里象月之規儻金之固灝灝如吞吐日月沈沈如韞蓄風雨所潤者遠原隰皆春疏爲斗門河渠通流

魏書成淹傳顯祖於仲冬之月欲巡漠北朝臣以寒甚固諫並不納淹上接輿釋遊論顯祖覽之詔尙書李訢曰卿等諸人不如成淹論通釋人意乃勅停行

北齊書文宣帝本紀天保九年詔限仲冬一月燎野不得他時行火損昆蟲草木

北史周高祖本紀建德元年十一月景午帝親御六軍講武於城南

荆楚歲時記仲冬之月采擷霜蕪菁葵等雜菜乾之並爲鹹菹注有得其和者並作金釵色今南人

作鹹菹以糯米熬搗爲末并研胡麻汁和釀之石榨令熟菹既甜脆汁亦酸美其莖爲金釵股醒酒所宜也

北史婆利國傳祭祀必以月晦盤貯酒殺浮之流水每十一月必設大祭

舊唐書職官志諸府折衝都尉每歲十一月以衛士帳上尙書省天下兵馬之數以聞

六典禮部尙書侍郎之職掌天下貢舉之政凡舉試之制每歲仲冬率與計偕其科有六一日秀才二曰明經三曰進士四曰明法五曰書六曰算凡此六科求人之本必取精究理實而升爲第其有博綜兼學須加甄獎不得限以常科

集賢注記自置院之後每年十一月內卽命書院寫新曆日一百二十本頒賜親王公主及宰相公卿等皆令朱墨分布具注曆星遞相傳寫謂集賢院本

通典唐貢士之科每歲仲冬郡縣館監課視其成者長史會屬寮設賓主有鄉飲酒禮歌鹿鳴之詩旣薦而與計偕

凡府在赤縣爲赤府在畿縣爲畿府衛士以三百人爲團團有校尉五十人爲隊隊有正十人爲火火有長火備六馱馬驢米糧介冑戎器鍋幕貯之府庫以備武事每歲十一月以衛士帳上於兵部以候徵發

中華古今注武德九年十一月太宗詔自今以後天子服烏紗帽百官士庶皆同服之

唐書太宗本紀貞觀元年十一月己未許子弟年十九以下隨父兄之官所

通鑑貞觀四年十一月上讀明堂鍼灸書云人五臟之系咸附於背戊寅詔自今毋得笞囚背

唐會要貞觀九年十一月康國獻金桃銀桃詔命植苑中

實錄貞觀十一年十一月乙未狩於濟源之陵山親御弓矢以所獲鹿薦廟

通鑑貞觀十二年十一月丁未初置左右屯營飛騎於元武門以諸將軍領之又簡飛騎才力驍健
善騎射者號百騎衣五色袍乘駿馬以虎皮爲韉凡遊幸則從焉

唐會要貞觀十三年十一月三日揚州長史李襲譽撰忠孝圖二十卷上之太宗覽而稱善

冊府元龜貞觀十六年十一月甲子幸慶善宮召武功之郃城立節三時豐義四鄉士女七十以上
及居宮側數百人賜宴父老爭上壽賜帛有差

唐書太宗本紀貞觀十七年十一月壬午以涼州獲瑞石赦涼州

唐會要貞觀十七年十一月二十八日誕皇孫宴宮寮於弘教門太宗幸東宮自殿北門入謂宮臣
曰頃來生業稍可非乏酒食而唐突公等宴會朕有甲觀之慶故就卿等爲樂耳

唐書太宗本紀貞觀十八年十一月庚辰遣使巡問鄭汝懷澤四州高年宴賜之

唐會要永徽三年詔律學未有定疏宜廣召解律人修義疏使中書門下監定參撰律疏成三十卷四年十一月九日上之詔頒行天下

顯慶二年十一月二十一日講武澧水之南行三驅禮設次於尙書臺以觀之許州長史封道弘奏臺本漢南郡太守馬融講尙書於此因以爲名今陛下親降此臺以觀校習請改爲講武臺從之玉海上元舞者高宗所作也舞者百八十人衣畫雲五色衣以象元氣其樂有上元二儀三才四時五行六律七政八風九宮十洲得一慶雲之曲大祠享皆用之至上元三年十一月三日詔惟圖丘方澤太廟乃用餘皆罷

唐會要儀鳳二年十一月六日太常少卿韋萬石奏據貞觀禮郊享日文舞奏元和順和永和等樂舞者著姿貌冠舞執籥翟武舞奏凱安舞者著平冕執干戚詔錄凱安六變法象奏聞

調露元年十一月十一日于陽城周公測景所得土圭長丈二尺七寸

全唐詩話景龍二年十一月十五日中午宗誕辰內殿聯句爲柏梁體